

საბჭოთა კავშირის თასზე ბომბარდირი ფორმაში შედის

თბილისი. „ლოკომოტივის“ სტადიონი. 12 მარტი.

„დინამო“ (თბილისი) – „შახტიორი“ (ყარაგანდა). 3:0 (2:0).

„დინამო“: სტეფანია, მოძუაშვილი, ჭელიძე, ხურცილავა, ებრალიძე, გავაშელი, კუტივაძე, მ. მაჩაიძე, გუცაევი, გ. ნოდია, ლ. ნოდია.

„შახტიორი“: ვოლკოვი, პოდლიხი, აშირბეკოვი, გერასიმენკო, ვალკოვი, კოტოვი, ჩენცოვი, ნოვიკოვი, აზგოლცი, დავიდი, სავჩენკო (ბუსუევი).

მსაჯი ტ. ბახრამოვი (ბაქო).

თასის მატჩებში ხუმრობა არ შეიძლება – ეს კანონია. ყველაზე სუსტი და უძლური გუნდიც კი სრულ მზადყოფნაში ხვდება ფავორიტებთან მატჩებს და ხშირად იმარჯვებს კიდეც. მაგრამ ყარაგანდის „შახტიორი“ თავისთავად არც სუსტი მეტოქეა და არც უძლური. გარდა ამისა, იგი წლეულს გაძლიერებულია ალმა-ათის რამდენიმე მოთამაშით და მიმდინარე თასის გათამაშება დაატოვებინა უმაღლესი ლიგის გუნდს – მინსკის „დინამოს“ (1:1, 1:0).

თბილისელებმა გაითვალისწინეს ეს გარემოება და სრული პასუხისმგებლობით ჩაატარეს მერვედფინალის პირველი მატჩი საკუთარ მინდორზე. საგანგებო აღნიშვნის ღირსია გუნდის თამაში პირველ ტაიმში: საუკეთესოდ მოქმედებდა თავდასხმის ორივე ფლანგი, იერიშებში ხშირად მონაწილეობდნენ ნახევარმცველები.

განსაკუთრებით სასიამოვნოა, რომ კვლავ დაიბრუნა შედეგიანი მოთამაშის საუკეთესო თვისებები ჩვენმა უძლიერესმა ბომბარდირმა გ. ნოდია. მისი ნეიტრალიზება სტუმრებისთვის გადაუჭრელ პრობლემად იქცა. დინამოელთა ცენტრალური თავდამსხმელი განუწყვეტლივ მოძრაობს, იცვლის პოზიციას, ეძებს გზას მეტოქის კარის ასაღებად და, ამას გარდა, ბევრს და ნაყოფიერად თამაშობს შუა მინდორშიც. თუ გ. ნოდია ასეთი ტემპით „იარა“, იგი სულ მალე შევა გ. ფედოტოვის სახელობის „100-ანთა“ კლუბში, რომლის „საწევრო“ მან ბოლო ორ მატჩში უკვე 6 ბურთი შეიტანა. „შახტიორის“ კარი უკვე მე-9 წუთზე აიღეს. მოძუაშვილის, მაჩაიძისა და გ. ნოდის გათამაშებული კომბინაციის შედეგად გ. ნოდია საკმაოდ ძნელ მდგომარეობაში აღმოჩნდა მეტოქის საჯარიმო მოედანზე, მაგრამ ოსტატურად გადაუგდო ბურთი კარიდან წინ გამოსულ ვოლკოვს – 1:0.

ხანგრძლივი, მწვავე იერიშების შემდეგ, 31-ე წუთზე, გ. ნოდია მიიღო მაჩაიძის თავური გადაცემა და მეორედ აიძულა ვოლკოვი ბადიდან გამოეტანა ბურთი.

მეორე ტაიმი სანახაობრივი თვალსაზრისითაც ჩამორჩებოდა პირველს და თბილისელთა თამაშიც გაუფერულდა. ნახევარდაცვაში მაჩაიძე ზედმეტად ატარებდა ბურთს, ლ. ნოდია მთლიანად ჩააბარა ინიციატივა თავის უშუალო დარაჯს, დაცვაში, განსაკუთრებით ფლანგებზე, ხშირი იყო შეცდომები, საქმე იქამდე მივიდა, რომ ყარაგანდელები კარგა ხანს სახიფათოდ უტევდნენ მასპინძელთა კარს, მაგრამ მატჩის ბედი საბოლოოდ გადაწყდა 59-ე წუთზე, როცა გუცაევმა ორ მცველთან ბრძოლაში გაიმარჯვა, შეიჭრა საჯარიმო მოედანში და აქ ვალკოვის სარმას „წამოეგო“. გ. ნოდია ზუსტად გამოიყენა პენალტი – 3:0.

მერვედფინალის საპასუხო მატჩი დინამოელებს ყარაგანდაში 16 მარტს აქვთ.

რ. ქორიძე

“ლელო” 14.03.72